

# **Reglament**

## **dalla vischnaunca da Medel/Lucmagn davart il lungatg official communal**

### **Art. 1 Finamira**

Il romontsch sursilvan ei il lungatg official dalla vischnaunca.

Quest uorden regla siu diever. El ha la finamira da garantir il diever dil romontsch sco lungatg official da vischnaunca els divers secturs dall'administraziun, dalla scola e dalla preschientscha publica e vul cheutras gidar a mantener il romontsch.

### **Art. 2 Denominaziun**

La denominaziun en quest reglament vala per persunas, funcziuns e mistregns dad omisduas schlatteinas.

### **Art. 3 Decrets legislativs**

Ils decrets legislativs vegnan redigi en romontsch, en particular:

- a) la constituziun communal;
- b) las leschas, ils uordens ed ils reglaments da character general abstract sco era ils decrets e las publicaziuns officialas che sedrezzan alla publicitad.

Sche translaziuns en auters lungatgs existan, vala la versiun romontscha sco officiala.

### **Art. 4 Radunonzas e tschentadas**

Las radunonzas e tschentadas dils organs communal vegnan menadas e protocolladas en romontsch. Sin damondas e propostas en auters lungatgs naziunals vegn per regla priu posiziun en romontsch.

## **Art. 5                    Administraziun**

L'administraziun succeda da principi en romontsch, en particular:

- a) la correspondenza, decisiuns e disposiziuns communalas che sedrezzan a persunas domiciliadas en vischnaunca;
- b) circularas e communicaziuns che sedrezzan a l'entira populaziun domiciliada;
- c) per regla era correspondenza ed inoltraziuns allas autoritads cantunalas e federalas ed a lur uffecis;
- d) publicaziuns officials.

## **Art. 6                    Scolaziun**

La vischnaunca meina la scoletta e las scolas tenor legislaziun cantunala per scolettas e scolas romontschas.

La vischnaunca sustegn activitads che promovon l'integrasiun linguistica dils habitonts ella cuminonza.

## **Art. 7                    Inscriziuns**

Inscriziuns drizzadas alla publicitad e reclamas stablas che pretendan ina lubientscha communal ston esser romontschas.

Las vischnauncas san lubir excepziunalmein translaziuns. Lubidas ein era terminologias internaziunalas che selain buca translatar.

Inscriziuns existentas buca romontschas san restar vinavon. La vischnaunca s'engascha denton per che quellas vegnien adattadas el senn da quest artechel.

## **Art. 8                    Inoltraziuns**

Inoltraziuns da persunas privatas u giuridicas domiciliadas en vischnaunca han da principi da succeder en romontsch.

## **Art. 9                    Contribuziuns**

En connex cun contribuziuns communalas per arranschaments publics animescha la vischnaunca da duvrar il romontsch.

## **Art. 10                  Execuziun e coordinaziun**

L'istanza cumpetenta e responsabla per l'execuziun da quest reglament ei la su-prastonza communal.

Quella collavura el rom dalla conferenza dils presidents da vischnaunca dil cumin cun las autras vischnauncas per realisar ils postulats da quei reglament.

La conferenza dils presidents da vischnaunca collavura e coordinescha las lavurs tenor al. 2 cun las conferenzas dils presidents da vischnaunca dils auters cumins dalla Surselva, sco era cun las instanzas cul medem intent dad autras regiuns e cun instituziuns per il manteniment dil lungatg romontsch.

## **Art. 11                  Entrada en vigur**

Quest reglament va en vigur suenter esser acceptaus dalla cuminonza dils votants en la votaziun communal all'urna digl **1. da december 1996**.

La presidenta communal:

Il canzlist communal:

Anna Bundi-Pally

Gion Lutz